



TUSI 'AU LEOLEO

2020



Ia Tatou Tatalo

EKALESIA FAAPOTOPOTOGA KERISIANO SAMOA

TUSI 'AU- LEOLEO 2020

UPU TOMUA:

Ua mapu i sasaga Galuega Tatalo o lenā Tausaga, a e o le a le alo ma fa'anape ai le foe o lenei fo'i Tausaga, auā ua poloa'iina i tatou e le Leoleo Sili, ia tatou mataala ma tatalo pea. Ia manatua o le ute lea o la tatou Galuega, o le tatalo pei o la Iesu, "nei o'o mai fa'aosoosoga" Fa'amalo i le Ekalesia le Soifua Tatalo.

O lea ua ma'ea tapena le Tusi Tatalo mo le 2020 e la outou Komiti o le fa'amoemoe ua saunia ai ta'iala mo a tatou Talosaga. E fa'amau fo'i le agaga fa'afetai o le Komiti i le ma'au fa'a-le-agaga o le 'Au-uso Faife'au na tapenaina lenei Galuega maea. O le vaega muamua o Ianuari - Iuni, sa tapenaina e le Susuga ia Gafualeata Fautua FS o le Matagaluega Niusauelese a o Iulai - Tesema na saunia e le Susuga ia Leama Faletoese FS o le Matagaluega a le Itu-o-Tane.

E maualuga i le loto se manatu, ua na o se Galuega ua fae'e le 'au'au, a e fa'amoemoe i le mana o le Agaga Paia, e atoatoa ai le fa'ataunu'uina ma le ofoina o le soifua Tatalo o lana Ekalesia. Sagai ane laia, "*Se'i o tatou Tatalo*".....

Alofa'aga ma Fa'amanuiaga mai ia:

Uilipifosi.K.Te'o

Failautusi Komiti Au Leoleo

05-11 IANUARI 2020**Tusi Faitau:** 1 Samuelu 17: 45-47**Manatu Autu:** “TULI I LUMA SO TATOU ‘AI”
(*Press onward for blessings*)**Faafetai:**

Ona o fa’afatiatama’i e fetaia’i ma le tagata fa’atuatua e fa’atupuina ai lona fa’amoemoe. Ona o lu’itau o le Tausaga ua mavae na lu’itauina ai le agai i luma o le Ekalesia. Auā e le tu fa’a-Koliata pea ni fa’afitauli, pe a saunia fa’a-Tavita le ola i le Agaga.

Faatoesega:

Ona ua tauau ina le tulia i luma so tatou ‘ai, ona ua itiiti le fa’amoemoe i le Atua. Ona o atugaluga o le loto ma le mafaufau i galuega fai ua avea ma ala e tafea ai le fa’amoemoe ua leva ona i a’ao o le Atua.

Manaoga:

Ina ia mau pea le taula o le fa’amoemoe i le Atua, po o fea lava le ogasami, pe fesouaina po o le malū, a ia agai pea i luma i le suafa o le Alii o ‘Au. A o’o mai lo tatou le iloa o le ala, ia mautū pea le talitonuga, e fa’atonu le Atua mo i tatou.

12-18 IANUARI 2020**Tusi Faitau:** Salamo 37: 23-28**Manatu Autu:** “O LE TAGATA E FAATONU MAI E LE ATUA LANA SAVALI”
(*God directs our path*)**Faafetai:**

Ona o lo o fa’atasi mai pea le Atua i la tatou savaliga amata. Ona o ala o le Atua e ‘ese mai i ala o le tagata, peita’i ua Ia lavea’iina pea le tagata mai le ma’a tui ma le ma’a fa’a-lavea a’ao. Ona ua tatou talia gofie mea faigata o le olaga, ina ua tatou mautinoa, o lo o fa’aaogaina i tatou e le Atua mo le manuia o tagata.

Faatoesega:

Pe afai ua tatou le fialia i le ala ua faasino e le Atua tatou te savavali ai. Fa’amagalo lo tatou le lava papale ma le lē onosai e ui i le ala e tau i le Atua ua tatou mele ai ona manuia. Ona o ituaso e ama ai la tatou va’ai i le fa’atautaiga a lo tatou Alii.

Manaoga:

Ina ia taofi mau e le Ali’i o tatou lima i taimi e papa’u ai le fa’atuatua. Ia tatou maua ai le fa’asiliga malosai e amata ai le savaliga o lenei Tausaga fou. Ina ia tatou ‘alo’ese i ala leaga, a e savavali i ala lelei.

19 - 25 IANUARI**Tusi Faitau:****Mataio 14: 17-21****Manatu Autu:****“FA’AMANUIAGA O LO O I LE TOFITOFI”***(Blessings in sharing)***Faafetai:**

Ona o le mana o le Ali’i na te fa’atupuina o tatou manuia e ui i lo tatou le atoatoa. Ona o le tele o taimi, e amoina e le Atua le mamafa o la ta avega, a’emaise lava i taimi e vaivai ai le fa’atuatua. Ona o Iesu le Areto o le Ola sa tofitofi lona tino paia i puapuaga o le satauro, ina ia maua e tagata uma fa’amanuiaga e fa’avavau.

Faatoesega:

Ona o nisi taimi ua ia i tatou le lagona e “leai ni a tatou mea iinei.” Ona o le vaivai o le fa’atinoga o tatou tofi.

Manaoga:

Ina ia tumau pea le fa’atuatua, o le tofitofi e fa’atele ma faamaopoopoina le fa’amoemoe. Ia fa’aatoatoa e le Atua mea ua le o’o i ai lo tatou malosi ma le iloa.

26 IANUARI - 01 FEPUARI**(VAIASO E A’E AI A’OGA)****Tusi Faitau:****Ioane 12: 20-26****Manatu Autu:****“TOTOINA A E LE O TANUMIA”***(Planting, not burying)***Faafetai:**

Ona o le fa’atuatua ua avea ma fatu o le Talalelei. Ona o le fua mai o le fatu na toto, ua iloa ai le matagofie o le ola fa’atuatua. Ona o le soifua tatalo o le Ekalesia.

Faatoesega:

Ona ua lē fua mai le lelei i le olaga o le tagata Ina ua tatou fa’apelepele ma fa’amuumua le ola i le lalolagi.

Manaoga:

Ina ia loto tetele pea le Ekalesia e fa’alogo i le fa’atonu mai o le Atua. Ia fua tele mai le soifua fa’a-le-agaga o ona tagata. Ina ia fua tele mai le taumafai o fanau i a’oga o lenei Tausaga.

02-08 FEPUARI 2020**Tusi Faitau:****Sapakuka 3: 16-19****Manatu Autu:****“PE AFAI UA LEAI LAVA SE SUIGA”***(When there is no change)***Faafetai:**

Ona o le Alofa Tunoa o le Atua ua lava ma totoe mo i tatou. Auā e ui lava ina leai se suiga, a ia tumau pea le ola vivi’i i le Atua. Ona o loto mau o tagata i le Atua.

Faatoesega:

Ona ua fesiligia le auai ma le fa’afofoga mai o le Atua i o tatou fa’afitauli. Ona ua nā o taimi o le sologa lelei e fua mai ai lo tatou ola vivi’i.

Manaoga:

Ina ia utagia aso loulouā, o ni tofotofoga o le ola fa'atuatua. Ina ia tatou olioli i le Ali'i, tusa lava pe lutia i fa'afitauli.

09-15 FEPUARI 2020**TUSI FAITAU:****Fa'ataoto 27: 17****MANATU AUTU: “E FA'AMA'AI E LE U'AMEA LE U'AMEA”***(Iron sharpens iron)***FAAFETAI:**

Ona o mafutaga ma uso ā tagata, ua fai lea ma fa'atupu lagona fiafia i le loto. Ona o le va fealoaloa'i e mafai ai ona mafanafana le mafutaga i le va o tagata. Ona o mafutaga i totonu o 'Aulotu e fa'amalosia ai le soifua fa'a-le-agaga.

FAATOESEGA:

Ua lē iloa e tagata ona galulue fa'atasi, ma ola felagolagomai. Ua vaivai le soifua fa'a-le-agaga o le Ekalesia.

MANAOGA:

Ina ia ola fealofani tagata uma. Ina ia maua e tagata le filemu ua ia Iesu. Ia ma'ai le ola fa'atuatua o le Ekalesia.

16-22 FEPUARI 2020**TUSI FAITAU:****Salamo23****MANATU AUTU: “O LE LAO'AI UA MAEA TAPENA”***(A feast well prepared)***FAAFETAI:**

Ona o le alofa o le Atua e leoleo ma lavea i ona tagata. Ona o le faamaoni o le Atua, na te lē tuulafoaiina ona tagata. O le Atua le Ta'ita'i o le 'Au Leoleo, o le Leoleo lelei e to'atasi.

FAATOESEGA:

Ona ua faatoa iloa le manaia o le laoi a le Atua, ina ua samusamu i toega a le lalolagi. Ina ua tatou manatu faasausili ua lava ia i tatou le galuega. Ona o le te'ena o le fa'aafe a le Atua mo i tatou.

MANAOGA:

Ina ia tumau lo tatou faamaoni i le Atua, e taumasuasua ai pea a tatou ipu. Ia leoleoina tupulaga ma fanau i le laau ma le to'oto'o a le Leoleo Mamoe.

23-29 FEPUARI 2020**Tusi Faitau:****Timoteo 2:22-26****Manatu Autu:****“TAGO E TAU LE SESE”***(Prove them wrong)***Faafetai:**

Ina ua tofia i tatou o ni tagata fa'atauavaa e fai ma mea faigaluega o le Talalelei. Ona o lo tatou Valaauina fa'a-tagata auauna, e fai ai mo i tatou le amiotonu. Ona o le tele o lu'itau o le ola ofoina mo le Atua, e tupu ai pea le lototele. Fa'afetai ona o avanoa tatou te finau ai pea, e ta'u atu le amio fa'a-Iesu.

Faatoesega:

Ona ua tu'ufau o tatou loto i le femisaa'i ma le fe'inaua'i. Ona o tatou loto ua le māmā, ua fa'atupu ai le vevesi i aiga, nuu ma le Ekalesia.

Manaoga:

Ina ia tatou fa'aaogaina avanoa o fe'inauaiga ma fe'ese'eseaiga, e fa'ailoa atu ai le agamalu. Ia avatu le malamalama o Keriso o i totonu ia te i tatou e tineia ai le pogisa. Ina ia a'oa'o atu le onosai i ē o finau mai, latou te iloa ai le Upu Moni.

01-07 MATI 2020

Tusi Faitau:

Eperu 6: 13 – 20

Manatu Autū:

“IA TAULA I LE AGAGA LE FAAMOEMOE”

(Holy Spirit is the anchor of Hope)

Fa'afetai:

Ona o le Atua na te silafia tala atu o fa'afitauli, o lo o i ai le manuia. Ona o lo tatou fa'amoemoe ua taula i le Atua. Ona o le soifua tautua o le Ekalesia i lana Fa'amati. Faafetai ona o faamoemoega ua taula i le Agaga, tusa pe fesouaiina i ogasami malomaloā, a e tumau pea i le Atua.

Fa'atoesega:

Ona ua avea i tatou ma ala e se'e ese ai tagata mai le Atua. Ona o lo tatou fiu gofie ua fa'aoepepea ai la tatou folauga i ogasami e le i masani ai.

Mana'oga:

Ina ia mausali lo tatou fa'amoemoe i le Atua, e le se'etia gofie ai i faaososoga ma tofotofoga. Ina ia aumai le lototele, e taofi mau ai lo tatou talitonuga.

08-14 MATI 2020

Tusi Faitau:

Mataio 9:27-30

Manatu Autū:

“MANATUNATUGA, GAGANA, FA'ATINOGA”

(Thoughts, Speech, Action)

Faafetai:

Ona o le saolotoga ua aumai e le Atua e filifili ai i le ala e ola ai. Ona o aoaoga a Iesu o lo o lu'iina ai pea lo tatou ola fa'atuatua.

Fa'atoesega:

Ina ua le atagia i a tatou gagana ma amioga, lo tatou ola fa'atuatua. Ona o le sese o le fa'aaogaina o le gagana ua a'afia ai isi tagata.

Manaoga:

Ina ia alagaina pea le vi'iga o le Atua ma tausisi i le aga fa'a-kerisiano. Ina ia fa'amaloloina i tatou e tusa ma le fa'atuatua e matua malosi. Ina ia tatou maua le fa'atuatua e fa'amaloloina ai agaga. Ia tatou maua le mana o le Agaga tatou te faia ai le galuega faamalolo.

15-21 Mati 2020

Tusi Faitau: Mataio 6: 25-33
Manatu Autū: “POPOLE FUA!!”
(Don't worry, be happy!!)

Fa'afetai:

Ona o le alofa tausisi mai o le Atua, ua le fa'atuaoia lea. Ona ua leai se upu “popole” i le gagana a tagata fa'atuatua. Ona ua na o ni atugaluga e fai vavale le saili o le tagata i mea o le tino, a e 'oa pe ā saili i le Atua.

Fa'atoesega:

Ona o lo tatou fa'atuatua ititi i le Atua. Ona o le faalagolago pea o le tagata i lona lava malosi ma lona potu. Ina ua sili atu ona faataua le ofu ma le meaai na i lo le malo o le Atua.

Mana'oga:

Ina ia aua ne'i maumau le ola tauivi ona o le popole. Ia tatou fiafia i le foa'i a le Atua mo le asō. Ia tatou iloa, a fa'amuamua le Atua, e fa'amalieina mea uma e manatu i ai le tagata.

22 -28 MATI 2020

Tusi Faitau: 1 Peteru 3: 8-12
Manatu Autū: “A PULEA LE TAUTALA E MAUA LE OLA MA ILOA ASO LELEI”
(Guard your tongue, and you will find peace and good days in life)

Faafetai:

Aua a fa'autauta ma alofa le gagana, ua tatou maua aso lelei. Ona o la tatou aiā tatau o le ola ma le lelei. Ona o lo o ia i tatou le mana o le Atua e faamanuia atu ai.

Faatoesega:

Ona o le loto vaogata, e naunau lava i le tauvi ma sui ma le fa'amasino atu.. Ona ua fa'aaoga le laulaufaiva o se a'uuega e malepelepe ai aiga ma le Ekalesia. Ina ua tatou le mafai ona maua se gagana e to'afilemu ai le va nonofo ma uso a tagata.

Mana'oga:

Ina ia fa'agaganaina i tatou i upu e manuia ai. Ia fa'agaganaina i tatou e le Atua fetalai, tatou te iloa ai ona ola i aso uma.

29 Mati – 04 APERILA 2020**(ASO SA O LE LAUPAMA)**

Tusi Faitau: Numera 20: 17-21, 21: 1-3, Mataio 21: 2-5
Manatu Autū: “O LE ALA TELE O LE TUPU”.

*(The Kings' Highway)***Fa'afetai:**

Ona o Lē na afio mai i le suafo o le Alii, ua tatala ai mo i tatou le ala tele i le Faaolataga. Auā ana le finagalo i ai le Alii e leai so tatou ala i malo. Ona o le Atua e faatasi pea ma i tatou e le mafai e se isi ona fa'asaga tau mai.

Fa'atoesega:

Ona o tatou manatu e mafai lava ona saili o tatou lava ala e aunoa ma le Atua. Ona o lo tatou lē saili i le Tupu o Tupu tatou te maua ai le tonu sa'o.

Mana'oga:

Ina ia tatou uia le ala o lo tatou Tupu o Iesu, i le loto malie, e ta'uamionuina ai i tatou. Ina ia mana pea le tatalo a le Au leoleo auā le soifua fa'ale-agaga o le Ekalesia.

05-11 APERILA 2020**(ASO MALIU)****Tusi Faitau:****Ioane 19: 17-37****Manatu Autū:****“LE ATAMAI O LO O I LE SATAURO”***(The Wisdom of the Cross.)***Fa'afetai:**

Ona o le atamai o le Atua na faailoa mai i le Satauro o Iesu. Ona o le atamai o le Atua e poto ai lo tatou valea. Ona ua fa'aaogaina e Iesu lo tatou vaivai ma le faatauva'a.

Fa'atoesega:

Ona o le malosi o lo tatou valea ua tatou le iloa ai o le Alo lava o le Atua leni tagata. Ona o lo tatou finau vale i le amiotonu o le Atua.

Mana'oga:

Ina ia tatou fialia e amo le satauro, ma mulimuli ia te Ia. Ia aoga o tatou tagata e faasoa atu ai le atamai o lo o i le satauro.

12-18 APERILA 2020**(ASO SA O LE TOETU)****Tusi Faitau:****Luka 24: 1-8****Manatu Autū:****“FAAFETAI MO LE ASO SA UA MALIE MATA E VAAF”***(Thank you for Easter Sunday- a sight to behold).***Fa'afetai:**

Ona e le'i mafaia e le malosi o le tiapolo i le aso Faraile ona vaoia le mana o le Toe Tu i le Aso Sa. Ona o le Alofa Tunoa o lo tatou Atua ua atoatoa ai mea uma.

Fa'atoesega:

Ona o lo tatou ola pumo'omo'o ua saisaitia ai i tatou mai faamanuiaga o le Aso Sa. Ona o lo tatou ola le fa'amaoni, ua le faia ai le amiotonu.

Mana'oga:

Ina ia avea le Faaolataga ua saunia e Keriso Iesu, e malie ai o tatou mana'o i mea lelei uma. Ina ia tatou fialia i le Aso Sa o le Toetu manumalo

19-25 APERILA 2020**Tusi Faitau:** Isaia 40: 1-5**Manatu Autū:** “AVATU LE FA’AMAFANAFANAGA
(*Give comfort.*)**Fa’afetai:**

Ona o le galuega faamafanafana a le Atua mo o tatou tagata. Ua avea ma o tatou fa’asinomaga le faamafanafana o le tasi i le tasi. Auā o lo tatou faamafanafana atu e faamafanafanaina ai foi i tatou.

Fa’atoesega:

Ona o nisi o taimi ua tatou le fa’amafanafana atu a ua avea i tatou ma fa’amamafa. Ona ua fulitua mai nisi i lana Ekalesia ona ua lē fa’amafanafanaina..

Mana’oga:

Ina ia avea i tatou ma tagata e fa’alaulelei le ala tele i le vao lafulafuā mo lo tatou Atua. Ia aoga a tatou upu e fa’amafanafana a e le o le fa’atiga. Ia tatou galulue ma le mautinoa, e i ai ituaso o le pogisa, peitai e totogo pea malama o le taeao.

26 Aperila - 02 ME 2020**Tusi Faitau:** Ieremia 20: 7-13**Manatu Autū:** “O LE LAVEA’I”
(*The Helper.*)**Fa’afetai:**

Ona e le o tu’ua na o i tatou e feagai ma tagata agaleaga. Ona e silafia e le Atua fa’afitauli o tatou olaga, mai totonu o aiga e o’o atu i le Ekalesia. Auā o lo o fa’aalia pea le fa’amaoni o le tatou Atua lavea’i.

Fa’atoesega:

Ona ua leai se onosai ma se fa’apalepale e fa’atalitali ai le taimi o le Atua. Ona fa’ato’a tatou manatua le Atua i taimi e gata ai lo tatou malosi.

Mana’oga:

Ina ia mau pea le fa’atuatua i le finagalo o le Atua. Ina ia pa’i mai pea le a’ao lavea’i o le Atua, i taimi uma. Tatalo mo i latou o fa’ata’otolia i ma’i o le ola nei, ia pa’i atu i ai le a’ao lavea’i o le Atua.

03 - 09 ME 2020**Tusi Faitau:** 2 Tupu 4: 8-17**Manatu Autū:** “O LE TINĀ OLA MAGAFAGAFĀ”
(*A thoughtful mother*)**Fa’afetai:**

Ona o uiga fai mea lelei o Tinā. Ona o le mataala o Tina ua mautu ai aiga ma ola fiafia ai fanau. Ona o le agaga filiga ma le fai mea sili o Tinā e manuia ai aiga.

Fa’atoesega:

Ona o le fa'atamala o Tinā i le fa'atinoga o latou tiute. Ona o uiga fa'amauualuga o Tinā i le va feagai ai ma le Tamā. Ona ua vaivai le ola fautua o Tinā i mea e fa'alelei ai aiga.

Mana'oga:

Ina ia foa'i i Tinā le lototele ma le mataalia e atiina'e ai aiga. Ina ia tatou galulue fa'atasi ma Tinā e mama ai avega i aiga. Ina ia tatou tafieseā le sauāina o Tinā ma Tamaitai.

10 -16 ME 2020

(VAIASO MUAMUA O LE FONO TELE)

Tusi Faitau:

Teuterome 31: 1-8

Manatu Autū:

“O LE ATUA E TA'I TOE TAPUA'I”

(God leads, and will not forsake us!)

Fa'afetai:

Ina ua uli ma sao le sa o le Ekalesia i lenei fo'i va i Fono Tele ona o le fa'atautaiga a le Tautai Sili. Ona o le Atua auai mai, na te lē tu'una lava i tatou. Ona o le Atua e ta'i toe tapua'i faiva.

Fa'atoesega:

Ona o taimi sa fa'avaivai ai le folauga, ua le taualo fa'atasi ma le Alii. Ona ua manatu mama i le Atua, ua ama ai le silasila i fa'amanuiaga. Ina ua ta'i lava le tagata ia mo ia, a e le mo le Alii.

Mana'oga:

Ia fa'atautai le Atua tapua'i, fo'i i le Atua e manuia ai le Fono Tele a le Ekalesia. Ia maua se finagalo o le Laulau a Fono ma le Fono Tele auā lana Fono usu i lena Vaiaso. Ia manuia Aulotu o lo o tapuai mai.

17 - 23 ME 2020

(FONO TELE I MALUA.)

Tusi Faitau:

Kalatia 6: 7-10

Manatu Autū:

“NA O MEA E TE LULUINA E TE SELESELE”

(You reap only what you sow)

Fa'afetai:

Ona e le fua mai se leaga i se tagata amio lelei. Ona o le Ola fa'avavau ua selesele i ai le tagata fa'atuatua. Ua tatou selesele i mea lelei e tele ona o le Atua.

Fa'atoesega:

Ona o lo tatou manatu e selesele se lelei mai o tatou uiga pa'a'a. Ona o lo tatou augata e ola le amio lelei.

Mana'oga:

Ina ia tutusa lo tatou fiafia e selesele, ma lo tatou fiafia e lūlū. Ina ia aua nei o tatou fa'apalapala i le faia o le amio lelei. Ina ia avea le amio lelei e selesele ai se manuia o tagata lautele.

24 - 30 ME 2020

Tusi Faitau: Teuteronome 28: 1-14

Manatu Autū: “E FAASILISILI ‘OE E LE ALI’I LE ATUA”
(*The Lord your God will sanctify you.*)

Fa’afetai:

Ona o fa’amanuiaga tu’utu’uloloa a le Atua pe a tatou ola usiusitai. Ona o le Atua e manao ina ia tatou ola I le amiotonu ma le amio lelei. Ona o le tausii mai o le Atua ia i tatou i le ulufafo ma le ulufale.

Fa’atoesega:

Ona o taimi o lo tatou vaivai ua le lagona ai le fetalai mai o le Atua. Ona o lo tatou fia sili i mea valea. Ona o le femoumoua’i o le ola usitai ma fa’alogo i le Atua.

Mana’oga:

Ina ia toto’a la tatou faalogo i le fetalai mai o le Atua mo i tatou. Ina ia tatou usiusitai, i poloaiga uma a le Atua. Ina ia manuia lo tatou siosiomiaga.

31 Me - 06 IUNI 2020

(TUTO’ATASI O SAMOA)

Tusi Faitau: Esoto 3: 7-15

Manatu Autū: “E MAI LE ATUA LO TATOU SAOLOTOGA”
(*Our freedom is from God*)

Fa’afetai:

Ona ua fa’avae Samoa i le Atua. Ona o Taitai lelei pei o Mose ua latou faamaoni i le ta’ita’iga o le malō ma le atunu’u. Ona o le Talalelei ma lona sao taua mo Samoa ma ona tagata. Ona ua avea Samoa ma o tatou tofi mai le Atua.

Fa’atoesega:

Ua na ona faavae o Samoa i le Atua, a ua le moni ona atagia lea Faavae i le olaga o tagata. Ona o taitaiga fa’a-Farao ua olopalaina ai le ola o le toatele o tagata.

Mana’oga:

Ia i ai manuia o le Atua mo Samoa ma ona tagata. Ina ia faamalosi mai le Agaga Paia i le galuega a le Talalelei, e toe tata’i ai Samoa i le Atua o lo o faavae ai. Ia foai le loto alofa i Taitai o Samoa latou te lagona ai le iuleo o manaoga o ona tagata.

07-13 IUNI 2020

Tusi Faitau: Ioane 14: 25-31

Manatu Autū: “AUA LE TUUA SE AVANOA I LE TIAPOLO, TUTU I LUGA MA
O ESE”
(*Don’t give room to the devil, get up and leave.*)

Fa’afetai:

Ona o le Alofa Tunoa, e fa’atonu ma fa’ala’ei’auina i tatou ina ia loto tetele i le Galuega. Ona o le pule a Iesu e aoao tetele. Ona o lona a’oa’o mai i ala tatou te tete’e ai i le tiapolo.

Fa’atoesega:

Ona ua avea lo tatou ita ma ala mai o le tiapolo i totonu o mafutaga mafanafana.. Ona o taimi uma tatou te agaleaga ai, ua tatou tu'u avanoa ai i mala ma puapuaga e o'o mai i o tatou lotoifale. Ona o lo tatou fiafia e nonofo pea i le mea o i ai le pogisa.

Mana'oga:

Ina ia lagona i la tatou fa'alogo le musumusuga a le Agaga Paia, lo tatou Fesoasoani. Ina ia tatou iloa ona talia ma ola i manuia o le Atua ua na aumai. Ia maua le tofa fa'ale-Atua e fetu'utu'una'i i taimi e siisii ai le tai.

14 – 20 IUNI 2020

Tusi Faitau:

1Korinito 16: 5-9

Manatu Autū:

“O FAITOTO'A MATALA”

(Open Doors.)

Fa'afetai:

Ona o avanoa ua tatala mai e le Atua mo i tatou. Ona o lo o matala mai pea faitotoa o lona Alofa Tunoa mo i tatou.

Fa'atoesega:

Ona o le faapalapala e aga'i i le avanoa ua matala mai mo i tatou. Ona o lo tatou pala'a'ai e ulu atu i le faitotoa o fe'au ma galuega ua tu'u mai e le Atua. Ona ua tatou tapunia le faitoto'a e ala atu ai manuia o le Atua mo isi ona tagata.

Mana'oga:

Ia maua lo tatou malosi e tete'e ai mea leaga. Ina ia tatou maua le loto fiafia e ulufale atu ai i avanoa ua tatala mai e lo tatou Ali'i mo i tatou. Ia tatou maua pea le fa'atuatua pe ā fetaia'i ma faigata.

21-27 IUNI 2020

Tusi Faitau:

Kenese 28: 10 – 15

Manatu Autū:

“MEA UMA E TE ALU I AP”

(Everywhere you go).

Fa'afetai:

Ona o le Atua e tausii Feagaiga, e fa'amaoni lava lona alofa ia i tatou e ui i ni o tatou vaivaiga. Auā e le tu'ulafoa'iina i tatou, e tausii pea le Atua i mea uma tatou te o i ai. Ona o le Atua e muā'au ma muli'au i lo tatou ulufafo ma le ulufale.

Fa'atoesega:

Ona ua avea o tatou puapuaga ma ala e fa'aitiitia ai le loto fiafia ma tauau ina mou atu ai le faamoemoe. Ona o le fa'atuatua ua mate. Ona o lo tatou manatu mamā i Tofiga a le Atua.

Mana'oga:

Ina ia fa'amautuina i o tatou loto, e fo'ia e le Atua o tatou faafitauli uma. Ia tulituliloaina pea i tatou i le alofa laveai o le Atua. Ina ia i ai pea le Atua, i mea uma tatou te i ai.

28 Iuni – 04 IULAI 2020

Tusi Faitau: Fa'aaliga 15: 1-4
Manatu Autū: “TETELE MA OFOFOGIA”
(Wonderous and Amazing.)

Fa'afetai:

Ona o le Silisili ese o galuega e faia e le Atua, e le gafataulimaina i so tatou malosi. Ona o lo tatou Atua e ou le malosi uma lava Ona o le Atua e matata'u ia te Ia mea uma lava e vivi'I fo'i ia te Ia mea uma lava.

Fa'atoesega:

Ona o lo tatou lē iloa o le silisili ese ma le ofoofgia o Galuega tetele a le Atua. Ona ua tatou manatu mamā i le Galuega a le Atua. Ona o nisi taimi, ua tatou fesiligia le i ai o le Atua, pe a o'o ina ufitia o tatou olaga i fa'afitauli.

Mana'oga:

Ina ia fai i tatou ma vi'iga o le Atua i fa'a'iuga fai a o tatou olaga. Ia aua nei o tatou fa'apumo'omo'oina le Atua ona o a tatou amio leaga.

5 – 11 IULAI 2020

Tusi Faitau: Eseta 4:7-17
Manatu Autū: “SA'ILI LE ATUA MA LANA AMIOTONU, E MANUIA AI LE MALO O SAMOA”
(Seek God and his righteousness, to bless Samoa)

Fa'afetai:

Ona o le agaga sailimalo i le Atua o o tatou matua, ua mafai ai ona pulea e Samoa ona lava tagata. Ona o le Talalelei ua lima taitaiina ai upu fai a lo tatou malo, ina ia pulea i tu ma aga fa'akerisiano. Ona o le sao taua o le faiga-malo, o lo o galulue punoua'i mo le manuia o lo tatou atunuu.

Fa'atoesega:

Ona o faafitauli ua aliali mai, i le pule so'onafai ua taotaomia ai le saolotoga o tagata vaivai, ma manaoga o tagata o Samoa. Ona ua lē galulue fa'atasi le Malo ma le Ekalesia.

Mana'oga:

Ina ia foa'i mai le tofā mamao ma le fa'autautaga loloto i Ta'ita'i o le Malo, e pulea ai le atunu'u i ala o le amiotonu. Ina ia alofagia e le Faigamalo, ia faasoa tutusa faamanuiaga i Itumalo uma, a e aua le manatu fa'apito. Ina ia fa'amanuia le Atua i le ali'i Palemia ma lana Faigamalo, ma ia faafoe ma le fa'autauta le sa o Samoa.

12 – 18 IULAI 2020

Tusi Faitau: Ioane 10: 7 – 15

Manatu Autū: “O IESU LE LEOLEO LELEI MO LE MATAGALUEGA O LEOLEO”

(Jesus the good Shepherd and the Ministry of Police)

Fa’afetai:

Ona o le sao taua o lenei Matagaluega, o lo o galulue i taimi uma, aua le tausiga o le filemu o tagata lautele. Ona ua avea lenei Matagaluega ma to’omaga o tagata puapuagatia, e sulufai mai mo se fesoasoani. Ona o Iesu Keriso le Leoleo lelei, na te leoleo lo tatou ulufafo ma lo tatou ulufale.

Fa’atoesega:

Ona ua fa’aaoga sese tofi e fa’atino ai galuega, ma ua le iloa ai le va fealoaloa’i ma tagata. Ona o le fa’atamala o le Aufaigaluega i le fa’atinoga o latou tiute, ua le maua ai le saogalemu o tagata.

Mana’oga:

Ina ia faa’aupegaina alii ma tamaitai Leoleo i le tumu faale-agaga, e faafae ai ma le faautauta o latou faiva. Ina ia alofagia le soifua o le Aufaigaluega mai puapuaga aemaise o a’afiaga ona o tagata lē taupulea. Ina ia faamanuia le Atua i le Matagaluega ona o la latou tautua i le atunuu.

19 -25 IULAI 2020

Tusi Faitau: **Mataio 9: 1 – 7**

Manatu Autū: “O IESU LE FOMAI SILI MO LE MATAGALUEGA A LE SOIFUA MALOLOINA”

(Jesus the great Healer, for The Ministry of Health)

Fa’afetai:

Ona o le tautua a alii ma tamaitai Fomai i le tausiga o le mamalu o le atunuu, ua faataotolia i gasegase o le tino. Ona o ā latou polokalame faalauiloa, e lapataia ai le atunuu, mai le tele o faama’i. Ona o le tulaga maualuga ua ausia e le tomai faa-Fomai, e faatino ai galuega laveai, e ala i le mana fa’amalolo o Iesu.

Fa’atoesega:

Ona ua faatamala le Aufaigaluega, ua tulai mai ai faafitauli i le soifua o tagata. Ona o fe’ese’eseaiga fa’a-lotoifale o le Matagaluega ua ama ai le va’ai i mafatiaga o tagata. Ona o lo tatou fa’atalale i lapataiga a le Mtagaluega, ina ia malupuipua i tatou uma mai fa’ama’i.

Mana’oga:

Ina ia fesoasoani mai le Agaga o le Atua, e foia ni faafitauli o feagai ma le Matagaluega. Ina ia ave le faamuamua a le Matagaluega i le soifua maloloina o tagata. Ina ia faamanuia le Atua i le Matagaluega ona o la latou auaunaga, ia avea Samoa o se atunuu e soifua maloloina ona tagata.

26 IULAI - 1 AOKUSO 2020.

Tusi Faitau: **Fa’ataoto 4: 1 – 10**

Manatu Autū: “O IESU LE FAIAOGA MO LE MATAGALUEGA O A’OGA”.

(Jesus the Teacher, for The Ministry of Education)

Fa’afetai:

Ona ua maitauina le siitia o le malamalama o fanau i Matatā ‘ese’ese, e mafai ona galulue e atiae lo tatou atunuu. Ona o le sao taua o alii ma tamaitai Faiaoga, e a’oa’o lelei ai a tatou fanau. Ona o le lagolago malosi o matua, e faatauaina ai le avanoa e aoaoina ai fanau mo se lumanai manuia.

Fa’atoesega:

Ona o le manatu mama o le Aufaigaluega i le faatinoga o lo latou Valaauina. Ona o le faatamala o matua, ua avea le paiē ua taofi ai fanau e fai feau, a ua le auina i aoga. Ona o uiga mataga ma amioga lē pulea, ua aliali mai i fanau. Ua lape le Galuega a Matua fa’apea le Ekalesia.

Mana’oga:

Ina ia manuia fuafuaga fa’at’aatitia a le Matagaluega mo le agai i luma. Mata’itu lelei e le Matagaluega o Aoga ana fuafuaga faataatitia, ina ia mautinoa le faataunuuina ma faamalieina. Ina ia faatamaoigaina le Matagaluega i auala e foia ai le faafitauli. Ina ia tatou galulue faatasi, e ave le faamuamua i aoga a le fanau auā so latou lumanai manuia.

2 – 8 AOKUSO 2020.

Tusi Faitau: Iosua 24: 14 – 18

Manatu Autū: “AIGA MO LE ATUA”
(*Family for God*)

Fa’afetai:

Auā ua uma ona tapenaina e le Atua aiga. Ona o aiga, o lo o atagia mai ai le ola pulea ma le fiafia. Ona o aoaoga fa’akerisiano ua maua ai e aiga le ola fealofani.

Fa’atoesega:

Ona o le vaivai o le ola faa-le-agaga i totonu o aiga. Ona ua faatupulaia aiga malepelepe, Ona ua le faavaeina i le alofa. Ona o a’afiaga ua fesouaina ai olaga o le fanau ona o le sese o le taitaiga a matua.

Mana’oga:

Ina ia fesoasoani mai le Agaga Paia ia maua le loto fefa’amagaloa’i i totonu o aiga. Ina ia pulea pea e Iesu o tatou aiga, tatou te lagona ai le mafanafana o le Alofa.

9 – 15 AOKUSO 2020.

Tusi Faitau: Luka 15: 20 – 32

Manatu Autū: “O LE TAMĀ O LE MALU O LE FANAU”
(*Father, the fortress for children*)

Fa’afetai:

Ona o le alofa fa’a-Tama o le Atua ia i tatou o lana fanau, e ui lava ina tatou faagaloina o Ia, a e tumau pea lona faamaoni. Ona o le sao taua o Tamā i le tausiga o Aiga, Nuu ma Ekalesia. Ona o faataitaiga lelei a Tamā, e fai ma va’aiga i le aiga, e aoaoina ai le agai i luma o le soifuaga.

Fa’atoesega:

Ona o faafitauli ua tulai mai i Tamā ua lape ai lana tausiga i aiga. Ona o vaivaiga faale-tagata ua matuā toilalo ai Tamā.

Mana’oga:

Ina ia alofagia e le Atua Tamā uma o le atunuu, ia foai le soifua tulu’i ma le tofā manino, e tausia ai aiga. Ina ia lafoai e Tamā uma vaivaiga o le olaga, a ia taumafai e toe faaleleia sootaga ua afaina ona o le ola soonafai. Ina ia fesoasoani le Agaga Paia, e faasino Tamā i ala o le malamalama ma faafouina le mafutaga ma le aiga.

16 – 22 AOKUSO 2020.

Tusi Faitau: 2 Tupu 4: 8 – 17

Manat Autū: ‘O LE TINĀ LELEI E SILI ATU NAI LO PENINA’
(*A good Mother is worth more than Pearls*)

Fa’afetai:

Ona o le uiga fai mea lelei o Tinā e ui lava ina feagai ma puapuaga a e le mafai ona faafiti ona o lona alofa le faatuaioia. Ona o le mataala ma le ola finafinau o Tinā ua mautu ai aiga ma ola fiafia ai fanau. Ona o le agaga filiga ma le fai mea sili o Tinā, o a latou galuega ua manuia ai aiga.

Fa’atoesega:

Ona o le faatamala o le itupa o Tina ua avea taaloga ma mea faafiafia ua lape ai Tinā i le faatinoga o latou tiute Ona o uiga faamaualuga o Tinā, ua tauau ai ina le iloa le va feagai ai ma Tamā o le ulu o le aiga a ia manatua e Tina o ia o le fautua. Ona o le loto vaivai o Tinā ua avea le fefe i upu fa’amata’u mai ua le mafai ai ona tautala I mea e faalelei ai aiga.

Mana’oga:

Ina ia foai i Tinā le lototele ma le mataala, e galulue fiafia ai e atia’e le aiga ia onosai I faafitauli uma.. Ina ia tatou maua le agaga o le galulue faatasi ma ia lagolagosua i Tinā e avea ma faamama avega i aiga. Ina ia matua tafieseaa lenei uiga mataga o le sauaina o Tinā ma Tamaitai ma ia amanaia se fautuaga e manuia ai aiga.

23 – 29 AOKUSO 2020.

Tusi Faitau: Tito 2: 6 – 10

Manatu Autū: ‘O TAULELE’A O LE TAUTUA O AIGA, NU’U, MA LE
EKALEZIA’

(*Young men serve families, villages and churches*)

Fa’afetai:

Ona o le tautua matavela a taulele’a, e ala i le faatinoga o latou tiute. Ona o le itupā o taulelea ua tua i ai le tofā ma le faautaga a le nuu. Ona o tupulaga talavou a lo tatou atunuu, ua avea ma ave-fu’a e faalauiloa Samoa i le lalolagi.

Fa’atoesega:

Ona o amioga lē taupulea a taulelea ma tupulaga talavou. Ona o faafitauli i totonu o aiga, ua lape ai le tautua sa masani ai. Ona o vaivaiga o taulelea i nei aso, ua le iloa ai lona tulaga i totonu o le aiga.

Mana’oga:

Ina ia alofagia taulelea ma tupulaga talavou, foai le mafaufau lelei, e faafoe ai tiute. Ina ia alofagia fanau a Samoa o lo o aumau i atunuu mamao ma tautua mai matua ma aiga. Ina ia taitaiina e le Agaga o le Atua taulele’a ma tupulaga talavou, i le malamalama o Keriso.

30 AOKUSO - 5 SETEMA 2020.

Tusi Faitau: **Neemia 4: 1 – 6**
Manatu Autū: **O TALA MANAIA”**
 (An interesting story)

Fa’afetai:

Ona o le faatasi mai o le Atua, e iu manuia ai a tatou galuega. Ona e ui i le faifai tala mai o le lalolagi, a e saunia pea e le Atua le Talalelei mo tatou. Ona o le tala o le Faaolataga, e le uma lona manaia mai lea tupulaga i lea tupulaga.

Fa’atoesega:

Ona o a tatou tala faavaivai loto i le au faatuatua, ua fa’ava’atu’ia ai le fa’aalualuina o le Talalelei. Ona ua se’etia i tatou i tala le aoga a le lalolagi, ua tau le lagona ai le Talalelei e faamoemoe i ai le ola.

Mana’oga

Ina ia tatou onosai e fai galuega lelei mo le Talalelei a le Atua. Ina ia manuia le tala’iina o le Talalelei i le lalolagi, e ui e inosia ma fa’asi’ugutua e le toatele. Ina ia tatou galulue ma le faamaoni i le Atua, o le Tala manaia tele lea i lo tatou ola.

6 – 12 SETEMA 2020.

Tusi Faitau: **Tanielu 1: 11 – 21**
Manatu Autū: **“O TU MA AGANUU FAA-LE-FA’ATUATUA”**
 (Traditions of Faith)

Fa’afetai:

Ona o le sao taua o le Talalelei ma ana aoaoga, o lo o mamanuina ai a tatou tu ma agaifanua. Ona o a tatou tu ma aga fa’aaloalo ma le amio pulea ua toafilemu ai le va fesootai o tagata.

Fa’atoesega:

Ona o vaivaiga o tagata ua faaoga sese ai la tatou aganuu ua su’e mea ai i auala faitogafiti. Ona ua taumafai tagata e suia fa’aleiloga a tatou tu ma aga masani, e faamalie ai le tuinanau. Ona ua avea le malosi o tu ma aga mai fafo, ua tauau ina tafea ai a tatou measina, i le vasaloloa.

Mana’oga:

Ina ia tatou galulue faatasi, e toe lalaga a tatou tu ma agaifanua ne'i mou atu. Ina ia afua mai i o tatou aiga le aoaoina lelei o fanau i a tatou tu ma agaifanua. Ia faa-Talaleleia a tatou aganuu, ina ia faaleleia o tatou olaga i le va-tapuia ma le Atua.

13 – 19 SETEMA 2020.

Tusi Faitau: 1 Tupu 21: 1 – 7
Manatu Autū: O TATOU FANUA O TATOU TOFI”
(Our land, our heritage)

Fa’afetai:

Ona o le tofa na a’e i o tatou matua ua lagomau i tiasa, na latou fausia le tulafono e malupuipua ai o tatou eleele faaleaganuu. Ona o le tele o faamanuiaga ua tatou maua mai i fua o le laueleele, ua inu malie ai lea tupulaga ma lea tupulaga. Ona o fautuaga lelei mai nisi Faalapotopotoga e lapataia ai le tatou atunuu, ina ia mataala i mailei ne'i fāoa o tatou eleele e le matapoto o le fili.

Fa’atoesega:

Ona o le ola faapalapala ma le faatalale e galueaina o tatou fanua, ma faamalieina i tatou i mea lelei e foa’iina mai e le Atua. Ona o le manatu faapito ma le fia pule i meatotino e aia tutusa i ai le aiga. Ona o le paie, ua fiafia e ola i auala faigofie ua tele ai aafiaga ogaoga o le eleele.

Mana’oga:

Ina ia tatou mataala i le tausiga o lo tatou tofi mai le Atua. Ina ia foai mai le mafaufau lelei e galueaina ai le lauele’ele. Ina ia alofagia matai o lo o tausia tofi o aiga, ina ia alolofa i aiga aemaise o tupulaga fai mai.

20 – 26 SETEMA 2020.

Tusi Faitau: Luka 5: 4 – 11
Manatu Autū: “PUIPUIGA O LE SAMI MA LE GATAIFALE, O LO TATOU TIUTE LEA”
(Coastal management is our responsibility)

Fa’afetai:

Ona o le tamaoaiga o le sami ma le gataifale, ua saunia e le Atua aua lo tatou fofoga taumafa. Ona o fautuaga a le Matagaluega o Faiga Faiva ma le Siosiomaga, Ina ia tatou galulue e faamama le sami ma le gataifale. Ona o pulega a matai i nuu ina ia fagotaina le gataifale i auala talafeagai.

Fa’atoesega:

Ona o le ola le manatunatu o tagata e lafoai le otaota i le sami ma le gataifale. Ona o le faatamala o tautai ina ua fagotaina le gataifale i auala faasolitulafono ua faatamaia ai figota ma i’a laiti. Ona ua lape pulega a nuu, ma ua leai ai se galuega laveai e puipua ai le sami ma le gataifale.

Mana’oga:

Ina ia foai le mafaufau lelei i tagata, e puipui le sami ma le gataifale. Ia talosia le pulega a matai i nuu taitasi, e tapu le faaaogaina o le ava niukini po o fanai'a.

27 SETEMA - 3 OKETOPA 2020.

Tusi Faitau: Efeso 2: 14 – 22
Manatu Autū: “TASI IA KERISO”
(Oneness in Christ)

Fa’afetai:

Ona o Iesu Keriso na faavaeina le Ekalesia, e fausia mai i tagata o e talitonu ma faatuatua i lona suafa. Ona o le Ekalesia ua avea ma sootaga o tagata ua ofoina atu le soifua e tautua lana Galuega paia. Ona o le faamoemoe o le Talalelei a Iesu Keriso, ina ia tasi ai lana fanau.

Fa’atoesega:

Ona ua tatou le faamaoni i lo tatou valaauina ua faavaatua ma faavaivaia ai le soifua galulue o isi. Ona o faafitauli ua tulai mai i totonu o le Ekalesia, ua le iloa ai le va ma isi tagata. Ona o le sese o la tatou faamamafa, ua mafuli i le itu faaletino, a e vaivai i le ola faaleagaga.

Mana’oga:

Ina ia fesoasoani mai le Agaga o le Atua, e mafai ai ona galulue felagolagomai, ma atia’e le Ekalesia a Keriso. Ina ia saunia lelei le Aufaigaluega e tausia le ola faale-agaga o le Ekalesia, ina ia mauaa le ola faatuatua. Ia tatou galulue e opopo mai o tatou uso, a e aua le tusitusi lima.

4 – 10 OKETOPA 2020.

Tusi Faitau: Salamo 127: 3 – 5
Manatu Autū: O FANAU O LE LUMANAI MANUIA LEA O AIGA”
(Children are the bright future of Families)

Fa’afetai:

Ona o lau oloa taua ua foai mai e fa’afailele i le Talalelei ina ia avea ma mea faigaluega aoga i ou aao. Ona o matua ma le tausiga o fanau, ina ia soifua mama ma ola maloloina lelei. Ona o faataitaiga ma aoaoga lelei o lo o fa’alogo ai fanau i o latou matua.

Fa’atoesega:

Ona o le faatamala o matua i le tausiga o le ola tuputupu a’e o fanau. Ona o sauaga mataga a matua i a latou fanau, ua valetuulima ai le meaalofo a le Atua.

Mana’oga:

Ina ia tausia lelei le fanau, ina ia avea ma tagata faatuatuaina i le lumanai. Ina ia alofagia le sauni atu o le fanau mo le Lotu a Tamaiti. Ina ia avea fanau ma ave-feau o le Talalelei i le lumana’i. Ina ia aoaoina lelei le fanau i le Upu a le Atua, ia ola matata’u i le Atua ma loto alolofa.

11 – 17 OKETOPA 2020.

Tusi Faitau: Kenese 24: 1 – 10
Manatu Autū: “FAAMOEMOE I LE ATUA”
(Trust in God)

Fa’afetai:

Ona o lona tali mai i a tatou Tatalo i le faatinoga o lo tatou Valaauina i soo se feau. Ona o lona Agaga na tu’utu’ulau i o tatou faamoemoega, ua au ai la tatou ina’ilau i galuega lelei. I lona valaauina o i tatou e fai ma Avefeau o fa’amoemoega lelei.

Fa’atoesega:

Ona ua le tau lau o faamoemoega lelei, ona ua tatou le faamoemoe i le Atua. Ona ua tatou faavaivai i le faatinoga o lana Feau, ona o le faatuatua ititi. Ua le taunuu le tele o faamoemoega lelei, ona o lo tatou leaga.

Mana’oga:

Ina ia fesoasoani mai pea le Atua i faamoemoega lelei o lana Ekalesia. Ia faamoemoe Samoa i le Atua, e manuia ai ona tagata. Tatou faamalolosi e galulue ma tatalo, e maua ai le lototele e fa’aaau ai a tatou fe’au.

18 – 24 OKETOPA 2020.

Tusi Faitau: 2 Nofoaiga Tupu 35: 1 – 6
Manatu Autū: TALOSIA LE ‘AU-FAIGALUEGA GALULUE”
(Pray for those in the Ministry)

Fa’afetai:

Ona o le sao taua o le Aufaigaluega o lo o feagai ma le tausiga o Aulotu, ma lagolago i le atinae o le Ekalesia. Ona o le Agaga fa’apalepale o le Atua i le Aufaigaluega galulue i taimi e fesouaina ai le galuega i faafitauli. Ona o le mataala o le Aufaigaluega e tapu’e ma faafailele agaga o le Ekalesia.

Fa’atoesega:

Ona o le manatu mama o le Aufaigaluega i lo latou Valaauina. Ona o vaivaiga o le Aufaigaluega ua le mafai ai ona maua se toafilemu o le Ekalesia. Ona o mea fa’atauva’a o lo o to’ilalo ai pea i le ola valaauina.

Mana’oga:

Ina ia alofagia le Aufaigaluega, ia utupūpūina e le mana o le Agaga Paia, e faafoe ai le feau a Keriso. Ina ia foai le lototele ma le onosai i puapuaga ma fita o le galuega. Ina ia faamalolosi le Aufaigaluega e galulue punouai, mo le finagalo paia o le Atua.

25 – 31 OKETOPA 2020.

Tusi Faitau: Numera 11: 24 – 30

Manatu Autū:

“O LE TOFĀ FA’A-TAGATA MATUA”
(The wisdom of the Elderly)

Fa’afetai:

Ona o le fa’aaogaina e le Atua o tagata matutua, e auala mai ai ana fa’amanuiaga mo aiga, nuu ma Ekalesia. Ona o le tofa matua e faavae mai i le finagalo amiotonu o le Atua. Ona o le mana o le Agaga Paia o lo o tautoaluaina o tatou tofi ua valaauina ai i tatou.

Fa’atoesega:

Ona o lo tatou ola le sauniuni i taimi o tofotofoga. Ona ua tatou faamoemoe i lo tatou poto a ua tatou faatuatanai i le fesoasoani a le Agaga Paia. Ona o le ola faamaualuga ua le mafai ai ona galulue faatasi.

Mana’oga:

Ina ia tatou maua le poto o le Atua ina ia tatou malamalama i lona fa’amoemoe paia. Ina ia tatou mataala ne’i faaleaogaina lo tatou tautiga i le galuega. I le Agaga Paia ina ia aualiitia le tofa faa-tagata-matua.

1 – 7 NOVEMA 2020.

Tusi Faitau:

Faaaliga 2:8 – 11

Manatu Autū:

“IA TALOSIA AULOTU UMA A LE EKALEZIA”
(Pray for the Church)

Fa’afetai:

Ona o le lagona faatuatua moni na mafai ai ona foai e aiga o latou fanua e faatu ai le lotu. Ona e tiga lava ona tele tuatuagia, a ua ave lava le faamuamua e atiae ai le Ekalesia. Ona o le soifua fai mea sili o Tinā o le Ekalesia.

Fa’atoesega:

Ona o le manatu faatauva o tagata lotu i o latou tiute masani. Ona o faafitauli o lo o tutupu pea i le lotoifale o Aulotu. Ona o le ola faafofoga o tagata.

Mana’oga:

Ina ia tatou maua le agaga o le galulue felagolagomai, e atiae le galuega a Keriso. Ina ia tu’u ese o tatou vaivaiga a ia faatino le galuega a le tagata lava ia. Ina ia galue mai le Agaga Paia e tautoaluaina lo tatou vaivai.

8 – 14 NOVEMA 2020.

Tusi Faitau:

1 Peteru 2: 4-8

Manatu Autū:

“OFO I LE ATUA TAULAGA FA’A-LE- AGAGA”
(Offering spiritual gifts to God)

Fa’afetai:

Ona o Iesu Keriso lona Alo, o lo tatou Alii, o le na asaina le ala faitaulaga mo o tatou tagata. Ona o lona finagalo alofa, e avatu ai i tatou i le mafutaga faatasi ma Ia. Ona o mafutaga fa’a-le- agaga

a le au kerisiano, o lo o faaalua i le ola tapuai ma le ola faitaulaga. Ona o le EFKS ma lana Galuega fa'ale-agaga.

Fa'atoesega:

Ona o le le atoatoa o lo tatou ola talitonu, i le Taulaga Togiola na faia e Iesu. Ona o le tele ma le anoanoai o vaivaiga fa'a-le-tagata. Ona ua taumamao i tatou ma le ola tapuai ma le ola faitaulaga. Ona o lotatou faitio ma tusitusi lima i le agaga Faitaulaga o le Ekalesia.

Mana'oga:

Ina ia tupu tele lo tatou fa'atuatua, ma mumū pea meaalofa ua foaiina mai e le Agaga. Ina ia loto fiafia tagata uma e tapuai ma Faitaulaga i le Atua.

15 – 21 NOVEMA 2020.

Tusi Faitau: Salamo 118: 1

Manatu Autū: “O E LATOU TE FAATUPU LE LOTO FAAFETAI”
(*The stewardship of thanksgiving*)

Fa'afetai:

Ona o le atoatoa ma lelei tapenaina e le Atua o lana Fofoaga mo tatou. Ona o faamanuiaga faasoa mai a le Atua e le mavae mo lo tatou ola. Ona o avanoa ua saunia e le Atua e fa'ama'ite ai lo tatou loto faafetai.

Fa'atoesega:

Ona ua na o lo tatou fiafia e talia, a e galo le loto faafetai i le faapogai o manuia. Ona ua tatou le faaaogaina ma le tatau avanoa o faamanuiaga a le Atua ua ia i tatou ma o tatou aiga. Ona o le vaivai o le ola faafetai o le Ekalesia i le Atua.

Mana'oga:

Ia fa'apaiaina mea ua tatou ofoina atu mo le Ali'i, aua o a le Alii ia. Ina ia fa'atumauiina e le Agaga le so'otaga mafanafana ma isi, e fesoasoani ai ma le loto faafetai i ala eseese o lona alofa. Ina ia tatou talia ma le loto fa'afetai lana fa'asoa mai i aso ta'itasi.

22 – 28 NOVEMA 2020.

Tusi Faitau: Kenese 8: 18-22

Manatu Autū: “ONA O LE AGAGA FAAFETAI”
(*A token of Thanksgiving*)

Fa'afetai:

Ona o le amanaiaina pea o le tagata i lana galuega faaola. Aua o lo o tuuavanoa pea le Atua i le tagata e toe fa'alelei lana Fofoaga. Ona o lana foa'i o lo o avagalima ai le tagata mo lona agaga fa'afetai.

Fa'atoesega:

Ona ua tele lava ina 'ae'ae le tagata i lana foa'i, a ua leai se loto fa'afetai. Ona o le faigata ona iloa e le tagata lona taua i le Fofoaga fou a le Atua. Ona o le lē atoatoa o le agaga fai-Taulaga e tusa ma lona alofa mai.

Mana'oga:

Ina ia mafai ona fa'ataua e le tagata lona Siosiomaga ma mea ua ia te ia. Ia iloa e le tagata le taua tele o lona tulaga matua i le Fofoaga a le Atua. Ina ia gafatia e le tagata le agaga fa'afetai tele i le Atua, e ala i lana osiga Taulaga i lenei foi Tausaga.

29 NOVEMA - 5 TESEMA 2020.

Tusi Faitau: Ioelu 1: 1 – 10

Manatu Autū: “IA PUIPUI FUA O LE LAUELEELE MAI FAAMAI MA MEAOLA FAALAFUĀ”

(Protect our Crop production from diseases and invasive species)

Fa'afetai:

Ona o le tamaoaga ua fa'asoa mai e le Atua, e ala i fua o le lau'ele'ele, ua maua ai mea'ai auā le fofoga taumafa o le Atunuu. Ona o le tele o la'au aogā eseese o lo o tutupu i o tatou lafanua, ua mafai ona fai ai vaila'au, aua le togafitiga o gasegase. Ona ua saogalemu fa'atoaga ma mea totō mai fa'amai ma meaola faalafuā.

Fa'atoesega:

Ona o le fa'aaoga sese o fanua e galueaina ai atina'e lē talafeagai. Ona o le ola paiē e galueaina le vao ma fai maumaga. Ona o le ogaoga o a'afiaga o le lau'ele'ele ona o le manatu fa'apito o le tagata.

Mana'oga:

Ia fa'aosofia e le Agaga o le Atua le soifua galulue e atia'e le lau'ele'ele mo le manuia o aiga. Ia tatou fa'asoa le tamaoaga o le Atua ua sasa'a mai i o tatou lima.

6 – 12 TESEMA 2020.

Tusi Faitau: Salamo 78:70 – 72

Manatu Autū: “FAAEAINA”

(Exalted)

Fa'afetai:

Ona o lona fa'asoa mai o le poto ma le atamai ua liua ai lo tatou fa'atauva'a e aveia ma fa'aeaina. I lona Agaga Paia na maua ai le malosia ma le lototele e finau ai i mea faigata, ma manumalo ai. Ona o lona fa'amaoni na tali mai ai i la tatou tatalo fa'atauanau.

Fa'atoesega:

Ona ua tatou le ausia sini o faamoemoega lelei, ona o lo tatou ola le faamaoni i tauiviga o le olaga. Ona ua galo ia i tatou o Ia na te mafai ona siitia ma fa'aeaina i tatou.

Mana’oga:

Ina ia foai mai le atamai ma le poto atoa ma le fa’autauta ma le lotu matala e fa’atonutonu folau ai lo tatou ola ia te Ia. Ia a’oa’o mai i o tatou ola ua na o Ia e maua ai le ola fa’aeaina i fa’amanuiga uma ua tatau ma le olaga.

13 – 19 TESEMA 2020.

Tusi Faitau: 1 Korinito 1:26 – 31

Manatu Autū: “E SILI LE POTO MAI LE ATUA”

(Wisdom of God)

Fa’afetai:

Aua ua to’ai i manū le folauga sa tauasaina e fanau, e ala i a’oa’oga i lenei Tausaga. Ona o le sao taua o Faia’oga, i le fa’a-faileleina o fanau a le Atunu’u mo so latou lumana’i manuia. Ona o a’oa’oga o le atamai fa’a-le-Atua o lo o fa’asoa i fanau, e ala i le galuega a’oa’o a le Ekalesia.

Fa’atoesega:

Ona o le ola le fa’amaoni o le toatele o fanau i a’oa’oga. Ona o le toatele o fanau ua le atagia i lo latou aoaoina le poto mai le Atua. Mo faiaoga ua le faamaoni e fa’atino lo latou Vala’auina. Ia fa’amagalo le Ekalesia pe afai ua lape lana galuega a’oa’o atu.

Mana’oga:

Ina ia faamanuia le Atua i la’asaga o fa’atali mai mo fanau ua i’u manuia lo latou olaga a’oa’oina. Ia susulu malosi le malamalama o le Atua i lotu o fanau ma fa’apupula o latou mata i ona manuia. Fa’amaoni le Ekalesia e a’oa’o atu le poto o le Atua i fanau. Ia iloa e fanau ona fa’autauta ma fa’amuamua le Atua i o latou ala uma.

20 – 26 TESEMA 2020.

Tusi Faitau: Isaia 9: 6 – 8

Mantu Autū: “O LE UPU UA LIUTINO TAGATA”

(The word becomes flesh)

Fa’afetai:

Ona o le Upu ua liutino tagata e ala ia Iesu Keriso, o le Malamalama o le lalolagi. O le faamoemoe maualuga lea o lenei vaitau taua i le soifuaga o le au faatuatua, e manatunatu ai i le fanau mai o Iesu le Faaola.

Fa’atoesega:

Ona ua tatou le talia le afio mai o lo tatou Alii e pulea o tatou olaga. Ona o lo tatou teena pea o le Malamalama moni, na te taitai i tatou.. Ona o le solomuli o lo tatou ola faale-agaga, ua galo ai le Atua ma lona alofa.

Mana’oga:

Ina ia faamallosia o tatou lotu, ia avea i tatou ma molimau ola o le afio mai o Keriso. Ina ia faaaoga e le Alii lo tatou faatauvaa, e fai ma lamepa e faamalamalama le lalolagi agasala. Ina ia faatumuina e le Atua o tatou lotu i le olioli.

27 TESEMA 2020 - 2 IANUARI 2021.**Tusi Faitau:** Esoto 15: 22 – 27**Manatu Autū:** “A AULIA TAEAO MANATUA LE ASO”
(*Remember today tomorrow*)**Fa’afetai:**

Ona o le aao malosi o le Atua na taitai mai ai le tatou malaga umi, o le mea lea e tatau ai ona tatou vi’ia lona agalelei. Ona o le alofa fa’a-Tamā o le Atua, na te lei tuulafoaina i tatou o lana fanau. Ona o fafitauli o ananafi e aoao ai le asō a e faatonu folau ai a taeao.

Fa’atoesega:

Ona o le tatou ola masalosalo ua faavaivaia ai lo tatou faatuatua. Ona o le tau mamao o tatou ala mai le Alii. Ona o lo tatou ola femoumouai.

Mana’oga:

Ina ia alofagia e le Atua le tatou malaga umi o lenei Tausaga Fou, ia avea Iesu ma Tautai. Ina ia fesoasoani mai le Agaga Paia i itu aso e fesouaina ai le tatou malaga. Ia avea le Agaga Paia ma taula o lo tatou sa. Ina ia saunia faa-le-agaga i tatou uma, ma ia manuia le malaga! **Amene.**

E tali faaaliali mai pea le Leoleo Sili, i le tatalo e faia ma le faatuatua faamaoni.

AMENE